



**Ikawalong Domingo sa
Kasarangang Panahon
Marso 2, 2014**

RITO SA PAGESUGOD

P: Sa ngalan sa Amahan ug sa Anak
ug sa Espiritu Santo.

K: *Amen.*

P: Ang Ginoo maanaa kaninyo.

K: *Ug maanaa usab kanimo.*

Pasiuna ug Pag-abi-abi

Mga minahal kong mga kahigalaan:
Karong Dominggoha, nagkaduol
na kita sa panahon sa Kwaresma.
Gitawag kita sa pagpamalandong

Ma-Dominggong Tamdanang Liturhikal alang sa Simbahan sa Kabus sa Diwa sa Bag-ong Ebanghelisasyon

Ang Simbahan sa Kabus,
Apinaagi sa mga Gagmayng
Simbahanong Katilingban,
nakigduyog sa makaluwas nga
pag-antos ni Jesus pinaagi sa
pagsalikway sa idolatriya sa salapi
ug pinaagi sa bugtong pagsalig
sa Probidensya sa Ginoo nga
gipahitabo sa tawhanong kaayo ug
pag-amoma sa kinaiyahan.

Sa pagtuki sa nakab-ot nga partikular
nga ang-ang sa kalamboan sa inyong
GSK sa diwa sa Simbahan sa Kabus
ug sa tawag sa pagbag-o pinaagi sa
pangutana: Sa unsa mang paagiha
nga mabag-o pa gyud mo ug dugang
aron molambo pa kamo isip GSK ug
matuman ninyo ang pagka-Simbahan,
Simbahan sa Kabus?, makaayo pud
unta kon inyong balikan ang diwa sa
PKP-II kaniadtong 1991.

Sa unang bahin sa dokumento sa
PKP-II, atong mabasa kini: (8) Wala
kita ginhawai sa Espiritu sa sulod sa
usa ka basiyu. Mianhi siya kanato
dinhi sa Pilipinas uban sa tanan
niyang mga kalipay ug paglaum, sa
iyang mga kaguol ug kahigwaos;

karon, niining tuig sa Ginoo, 1991,
ang unang tuig sa katapusang dekada
niining kasamtangang milenyo, uban
sa tanan niyang mga suliran, mga
kahigayonan, mga saad.

(9) Diha sa Espiritu, mobalik-tan-
aw kita uban sa pagkahingangha sa
atong mga panaw isip usa ka nasud
nga kristohanon. Adunay mga
kahayag, adunay mga landong, mga
kalamposan ug mga kaparotan, apan
lusot kanilang tanan ang Espiritu
miginhawang gamhanan, mabatian,
naggiya ug nagtukmod ug nag-
una kanato padulong niining atong
nahimutangan karon.

Busa, sa inyong pagtuki sa partikular
nga ang-ang sa inyong tingusbawan
isip GSK sa diwa sa Simbahan sa
Kabus, unsang mga kahayag ug mga
landong ang inyong giagian sukad
pa sa pagsugod sa inyong GSK?
Unsa may mga hinungdan niini nila?
Unsa ang mga kalamposan ug mga
kaparotan ang inyong naangkon?
Ngano man? Ug sa inyong
pamalandong, asa man kaha kamo
dad-a sa maong Espiritu karon? ■

bahin sa misteryo sa mga kasakitan ni Jesus, mga kasakitan tungod ug alang sa kawsa sa Ginharian sa Dios, alang sa atong kaugalingong kalingkawasan gikan sa in hustisya ug pagdaugdaug, ug alang usab sa atong kaugalingong kaluwasan gikan sa sala ug sa kamatayon ngadto sa kinabuhing tunhay. Mag-ampo kita alang sa paglig-on sa atong pagtoo sa Dios, aron mahimo kitang iyang mga kasangkapan sa iyang Probidensya diha sa atong pagsalikway sa idolatriya sa salapi ug pinaagi sa atong pag-amoma sa mata'g usa ug sa tanang binuhat.

Akto sa Paghinulsol

P: Mga igsoon, pangayoon nato karon sa Dios ang kapasayloan sa atong mga sala ug iya unta kitang lig-onon sa mga panahon sa mga pagsulay.

P: Nagakompisal ako..

K: Sa Dios makagagahum sa tanan Inyo unta akong iampo sa Ginoo nga atong Dios. Amen.

P: Kaloy-an unta kita sa Dios...ngadto sa kinabuhing dayon.

K: *Amen.*

Himaya sa Dios didto sa langit...

Kolekta

P: Mag-ampo kita: Ihatag kanamo, O Ginoo, naga-ampo kami, nga pagatultulan unta sa imong malinawong balaod ang dagan sa among kalibutan ug nga ang imong Simbahan maglipay unta, nga walay nagabangbang sa iyang mga tulumanon. Pinaagi ni Jesukristo among Ginoo, Imong Anak, nga buhi ug hari uban kanimo diha sa kahiusahan sa Espiritu Santo, Dios nga usa, hangtud sa kahangturan.

K: *Amen.*

LITURHIYA SA PULONG

Unang Pagbasa: Is 49,14-15

L: Ang pagbasa gikan sa basahon ni Isaias... (*Pagabasahon gikan sa Kasulatan*)

L: Ang pulong sa Ginoo.

K: *Salamat sa Dios.*

Komentaryo sa Is 49,14-15:

Giyagyag niining matam-is nga mga linya ang makaluwas nga kahumok sa Dios sa konteksto sa Ikaduhang Awit sa Nag-antos nga Sulugoon ni Yahweh (Is 49). Dinhi gihulagway ang Dios nga usa ka babaye: usa ka inahan. Mao man gani nga adunay pipila ka mga batid nga tighubad sa bibliya ug mga teologo nga motawag sa Dios Inahan-Amahan. Uban sa pinakalawom nga inahanong pagpasalig, gialam-alaman ang Sion: gigarantiya sa iyang Inahang si Yahweh ang iyang kalingkawasan pinaagi ug diha sa iyang Nag-antos nga Sulugoon.

Salmo Responsoryo: Sal 62, 2-3.6-7.8-9

T: *Ang Dios lamang ang bugtong mong kapahulayan, kalag ko.*

L: Sa Dios lamang makapahulay ang akong kalag; gikan kaniya ang akong kaluwasan. Siya lamang ang bugtong kong bato ug kaluwasan, ang akong kota; wala gayo'y makasamok pa kanako.

T: *Ang Dios lamang ang bugtong mong kapahulayan, kalag ko.*

L: Sa Dios lamang makapahulay ang akong kalag, tungod kay gikan kaniya ang akong paglaum. Siya lamang ang bugtong kong bato ug kaluwasan, ang akong kota; wala gayo'y makatandog pa kanako.

T: *Ang Dios lamang ang bugtong mong kapahulayan, kalag ko.*

L: Uban sa Dios ang akong kaluwasan ug ang akong himaya, siya ang bato

sa akong kusog; ang akong tagu-
anan anaa sa Dios. Salig kaniya sa
tanang panahon, O akong katawhan!
Ibubo diha kaniya ang inyong mga
kasingkasing.

**T: *Ang Dios lamang ang bugtong
mong kapahulayan, kalag ko.***

Komentaryo sa Sal 62:

Gipadayag niining salmoha ang hingpit
nga pagsalig ug pagpiyal diha sa Dios
isip bugtong tinubdan sa kusog-moral
ug kalingkawasan-kaluwasan sa tawo.
Adunay duha ka mga tumoy nga
mahimong saligan sa tawo: (1) ang
salapi nga makakorap, nga makagun-
ob tungod sa iyang kinaiyang katakus
sa gahum, pamakak ug kabangis, ug
(2) ang Dios ug ang gahum sa iyang
makanunayong gugma. Kinahanglang
mopili ang tawo ug asa sa duha. Gipili
sa mag-aawit ang iya sa Ginoo.

Ikaduhang Pagbasa: 1 Kor 4,1-5

L: Ang pagbasa gikan sa unang sulat
ni Apostol San Pablo sa mga taga-
Korinto... (*Pagabasahon gikan sa
Kasulatan*)

L: Ang pulong sa Ginoo.

K: *Salamat sa Dios.*

Komentaryo sa 1 Kor 4,1-5:

Human i-presentar ang iyang mga
rebolusyonaryong mga hunahuna sa
1 Kor 3,16-23, karon panalipdan na
ni Pablo ang iyang kaugalingon. Sa
pinaaging personal kaayo, gitubag niya
ang mga atake ug saway sa mga taga-
Korinto ug sa iyang mga kaatbang,
sa paaging mainit ug mahigugmaon,
lig-on ug humok, pinabali ug punting
nga pagkasulti. Iyang gisugdan usa
pagpaila sa iyang kaugalingon ug sa
iyang mga kauban isip “mga sulugoon
ni Kristo” ug “mga piniyalan sa
mga misteryo sa Dios”. Wala niya
igsapayan kon unsa may gisulti sa mga

tawo bahin kaniya ni kon unsa man
ugaling ang iyang pagtan-aw sa iyang
kaugalingon. Ang paghukom lamang
sa Ginoo ang labing mahinungdanon.
Ug nahukman sa Dios nga siya ug ang
iyang mga kauban kasaligan niining
misyon: isip sulugoon ni Kristo,
masinati nila ang tanang matang sa
kasakit; isip mga piniyalan sa mga
misteryo sa Ginoo, isangyaw nila ang
Ebanghelyo ug ang daw dili-katohoan
ug rebolusyonaryong mga pangpuli
niini.

Ebanghelyo: Matt 6,24-34

L: Ang Ginoo maanaa kaninyo.

K: *Maanaa usab kanimo.*

P: Ang pagbasa gikan sa Ebanghelyo
ni San Mateo.

K: *Himayaon Ikaw, O Ginoo.*

P: (*Pagabasahon gikan sa Kasulatan*)

P: Ang Ebanghelyo sa Ginoo.

K: *Daygon Ikaw, O Cristo.*

Komentaryo sa Matt 6,24-34:

Gihambin niining mga tekstoha
ang duha ka mensahe: ang una,
mahitungod sa pagpiling radikal nga
angay buhaton sa tawo tali sa Dios,
ug sa tanan nga iyang gibarugan,
ug sa salapi, ug sa tanan nga iyang
gitimaan. Ang una maoy lintunganay
nga pagsimba, ang ikaduha idolatriya!
Gitangtang ni Jesus ang maskarang
nagtabon sa atong halawom nga
pagkahilig sa idolatriya: nag-ipon
kitag mga butang yutan-on, imbis mga
butang langitnon, ug nangatarungan
kita nga kining mga nagtipun-og
nga mga butang yutan-on ato man
usab ialagad sa uban, isip tinguhang
langitnon. Sa pagkatinuod lang, usa
ka kini ka matang sa pagkabuta, usa ka
pagpuyo sa kangitngit: ang kahuyang
sa mata nga mao man unta ang
kahayag sa lawas. Niining sentidoha,
giawhag gikan sa matag sumusunod

ni Jesus ang usa ka radikalismo: ang paggamit sa mata alang gayod lamang sa Ginoo, diha sa tanang mga butang! Ang ikaduhang mensahe mao ang pagsalig sa Dios! Apan dili kini binutang pagsalig ni pagdangop sa kapalaran o patalismo nga minggitib gikan sa yutan-ong tinguha ug tinagoang idolatriya. Kon dili, usa kini ka pagsalig ug pagpiyal sa Dios nga gikan gayod sa tinguha nga pangitaon usa, una sa tanan, ang Gingharian sa Dios ug ang iyang hustisya. Nagalihok ang Probidensya sa Dios sa natad sa pakigbisog alang sa maayo, alang sa hustisya ug kalinaw sa Dios, sa pagpatigbabaw sa dignidad ug kahalangdon sa iyang mga binuhat. Kinahanglang mahibatyagan nato dinhi nga diha sa uyukan sa Probidensya sa Dios anaa usab ang tawo, ang pagtinabangay sa mata'g tawo alang sa mga buluhaton sa kaluwasan, alang sa hustisya ug kalinaw! Ang tanan dinhi sa kalibutang nilalang naga-alagad niining maong tumonga. Mao man bitaw nga kining tanan gibalaan kay sila kahimanan man sa Probidensya sa Dios: sa iyang inahanon ug amahanong pag-amoma sa katawhan ug sa tanang nilalang!

Wali: Ang Simbahan sa Kabus, pinaagi sa mga Gagmayng Simbahanong Katilingban, nakigduyog sa makaluwas nga pag-antos ni Jesus pinaagi sa pagsalikway sa idolatriya sa salapi ug pinaagi sa bugtong pagsalig sa Probidensya sa Ginoo nga gipahitabo sa tawhanong kaayo ug pag-amoma sa kinaiyahan.


Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/Panawagan/Hagit
<p>Ang Simbahan sa Kabus, pinaagi sa mga Gagmayng Simbahanong Katilingban, nakigduyog sa makaluwas nga pag-antos ni Jesus pinaagi sa pagsalikway sa idolatriya sa salapi ug pinaagi sa bugtong pagsalig sa Probidensya sa Ginoo nga gipahitabo sa tawhanong kaayo ug pag-amoma sa kinaiyahan.</p>	<p>Unsay kasinatian sa inyong GSK sa salapi ug sa iyang gahum? Unsay kasinatian sa inyong GSK sa Probidensya sa Dios nga gipahitabo sa kamanggi-hatagon sa inyong mga miyembro ug mga higala, sa kalinis sa inyong palibot ug sa integridad sa inyong ekolohiya? Unsa may mga hulga nga anaa batok sa inyong paghinigugmaay ug sa inyong ekolohiya?</p>	<p>Gikinahanglan ba ninyong magpili tali sa Gingharian sa Langit ug sa gingharian sa kalibutan? Nakompromiso ba o nasakit ba hinoon kamo tungod sa inyong mga gipili? Asa kaha kamo padulong subay sa giya sa Espiritu gikan karon, sa natad sa pagpasaylo ug panag-uli, sa kausaban, pagbag-o ug kalingkawasan?</p>

Padayag sa Pagtoo

P: Nagatoo ako...

K: ...Sa Dios ang Amahan ang makagagahum sa tanan, Magbubuhath

Ubani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang gospelbreak.wordpress.com. o pinagi sa inyong smartphone o tablet i-swipe kini nga QR code.



sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

Mga Katilingbanong Pag-ampo

P: Mga hinigugma kong mga igsoon, dad-on nato karon sa atong Amahan sa langit ang atong mga kalipay ug mga paglaum, ang atong mga kasubo ug mga kahigwaos. Sa mata'g pag-ampo, motubag kita:

T: Ginoo, tabangi kami sa pagpakigduyog sa malingkawasan mong gugma.

L: Alang sa Simbahan: nga isip Simbahan sa Kabus sa tibook kalibutan, iya untang ipadayon ang pagpahimangno kanato sa sala sa idolatriya sa salapi ug sa grasya sa bugtong pagsalig lamang sa Probidensya sa Dios. Mag-ampo kita sa Ginoo.

T: Ginoo, tabangi kami sa pagpakigduyog sa malingkawasan mong gugma.

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip Katawhan

sa Dios: nga ila untang ipadayon ang repormang pastoral ug estruktural sa Simbahan aron malig-on pa pag-ayo ang iyang pag-alagad sa katawhan, ilabi na sa mga kabus. Mag-ampo kita sa Ginoo.

T: Ginoo, tabangi kami sa pagpakigduyog sa malingkawasan mong gugma.

L: Alang sa mga lideres sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga ila untang ipahigayon ang mga kahintang nga pabor sa pagkat-on ug pag-ugmad sa mga birtudes sa pagkamanggihatagon, pagkamainambiton ug pagkamaamomahon sa palibot ug sa ekolohiya. Mag-ampo kita sa Ginoo.

T: Ginoo, tabangi kami sa pagpakigduyog sa malingkawasan mong gugma.

L: Alang kanatong tanan: nga mangandam unta kita pag-ayo alang sa Semana Santa ug sa Dominggo sa Pagkabanhaw, pinaagi sa paghinulsol, pagpasaylo ug pagbag-o, sa puasa ug paghinatagay, sa abstinensya ug pagpugong sa kaugalingon, sa pag-ampo ug sa mga buhat sa kalooy ug kalingkawasan. Mag-ampo kita sa Ginoo.

T: Ginoo, tabangi kami sa pagpakigduyog sa malingkawasan mong gugma.

L: Alang sa atong mga minahal sa kinabuhi nga milalin na: nga diha sa kapasayloan sa ilang mga sala, maila na unta ang pahulay nga dayon diha sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

T: Ginoo, tabangi kami sa pagpakigduyog sa malingkawasan mong gugma.

L: Alang sa atong mga espesyal

nga mga tinguha, sa kahilom sa atong tagsa-tagsa ka kasing-kasing, (*mohilum kadiyot*) Mag-ampo kita sa Ginoo.

T: *Ginoo, tabangi kami sa pagpakigduyog sa malingkawasnong gugma.*

P: Ginoo, nagahangyo kami kanimo nga patas-an mo ang among partisipasyon sa imong Probidensya pinaagi sa pagpagahom kanamo sa pagpaambit sa bisan unsa nga anaa kanamo, pinaagi sa pag-amoma sa imong mga nilalang ug pag-amping sa kaangayan sa ekolohiya ug pinaagi sa mga buhat sa kalooy ug sa malingkawasnong ugma. Kini among gipangayo pinaagi ni Kristo atong Ginoo.

T: *Amen.*

LITURHIYA SA EUKARISTIYA

Pag-ampo Alang sa Mga Halad

P: O Ginoo, ikaw ang naghatag kanamo'g gasa aron maihalad sa imong ngalan ug nag-ihap sa mga halad isip timailhan sa among tinguha nga alagaran ka sa tumang kabug-os, nagahangyo kami sa imong kalooy nga unta ang imong gituga kanamo nga tinubdan sa katakus, makapadangat usab unta kanamo sa pag-angkon niining mga ganti sa katakus. Pinaagi ni Kristo among Ginoo.

K: *Amen.*

Pag-ampo sa Eukaristiya

Prepasyo

P: Ang Ginoo maanaa kaninyo.

K: *Maanaa usab kanimo.*

P: Ibayaw ang inyong mga kasingkasing.

K: *Amo nang gibayaw ngadto sa Ginoo.*

P: Magpasalamat kita sa Ginoong

atong Dios.

K: *Angay ug matarong.*

Rito sa Pangalawat

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

K: Amahan namo...

P: 'Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang magapaabot kami nga malaumon sa pagbalik ni JesuCristo, among manunubos.

K: *Kay imo man ang gingharian ug ang gahom, ug ang himaya hangtod sa kahangturan.*

Kordero sa Dios

K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.

Pangalawat

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: *Ginoo, dili ako angay nga mokalawat kanimo, apan ipamulong lamang ug mamaayo ako.*

Pag-ampo Human sa Pangalawat

P: Mag-ampo kita: Human mo kami pakan-a sa imong mga makaluwas nga mga gasa, nangaliyopo kami sa imong kalooy, Ginoo, nga pinaagi niining mao gihapong Sakramento nga nagbusog

kanamo niining kasamtangang panahon, himoon mo usab kaming makapanag-iy sa kinabuhing walay katapusan. Pinaagi ni Kristo atong Ginoo.

K: Amen.

Katapusang Bendisyon

P: Ang Ginoo maanaa kaninyo.

K: Maanaa usab kanimo.

P: Moduko kita aron dawaton ang bendisyon sa atong Ginoo: Bendisyonan unta kamo sa Dios sa tanang grasyang langitnon, himoon unta kamo niyang balaan ug dalisay sa iyang panan-aw, bubu-an unta kamo niya sa kaabunda sa mga bahandi sa iyang himaya, ug tudloan kamo niya sa mg pulong sa kamatuoran; hinaut iya kamong pahimangnoan sa Ebanghelyo sa kaluwasan, ug sa kanunay hatagan kamo sa gugmang inigsoonay.

K: Amen.

P: Ug ang mga panalangin sa Dios nga makagagahum sa tanan: ang Amahan, ug ang Anak ug ang Espiritu Santo, mokunsad unta diha kaninyo ug magpabilin diha kaninyo kanunay hangtud sa kahangturan.

K: Amen.

P: Panglakaw kamo sa kalinaw, ug himayaa ang Dios pinaagi sa inyong kinabuhi.

K: Salamat sa Dios.■

**Aron maka
duyog kita sa
malingkawas-
nong gugma sa
Dios,
kinahanglang
isalikway nato,
isip Simbahan sa
Kabus, ang
idolatriya sa
salapi apan
mosalig
lamang sa
Probidensya sa
Dios.**

Gipatik sa
**COMMUNICATION FOUNDATION
FOR ASIA**

Visit: cfamagazines.wordpress.com

Kauban sa
MISSIONARIES OF THE SACRED HEART
Visit: www.misacor.net



*Ginoo,
tabangi
kami sa pag-
pakigduyog
sa maling-
kawasnon
mong
gugma.*